

دردنجی جلد

نمبره ثانی - ثانویہ اول ۱۹۲۵

صافی : ۵

دارالفنون

ادبیات فارسی و عربی و اسلامیات

فلسفہ ، اجتماعیات ، تاریخ ، جغرافیہ ، ادبیات

ایک آبدہ بر نشر اول نور

مندرجات

علی حیدر

ازمیری اسماعیل حق

نجیب عاصم

محمد شرف الدین

محمد امین

نبات حامد

ذکا تدقیق لری

ایک توروک فیلسوف

علم لسان

متنبی

فرہ دریق نیچہ وبر معرفت نظریہ سی

دہ موقراسی و معشری وجدان

استانبول — مطبعہ عامرہ

۱۹۲۶

فهره در یق نیچه و بر معرفت نظریه سی

نیچه ۱۹۰۰ سنه سنک آغستوسنده اولمشدی . اونی غائب ایدملی یکر می بش سنه یی کچمشدر . ده دو غریبی نیچه ۱۸۸۹ ده بردها کنه دینی بیلمه مک اوزره خسته لاندینی ، جنت غرور و اراده نک بو بویوک مثلی یا قالدینی ایچون اونی وفاتندن اون برسنه اول غائب ایتمش ایدک . او تاریخ دبری زمان کچدکجه بو آلمان شاعر - فیلسوفنک شخصیتی ، اثری تدقیق و تنقید ارزو سی زیاده له شیور . نیچه نک اک مهم اهمیتی ارنکله یالکیز فلسفه ایله اشتغال ایده نلرک دکل ، هرمنورک علاقه دار اولماسی ، اثرلرینک شو ویا بوقسمی ، شو ویا بو وجیزه Aphorisme سی ایله بوتون منورلرجه طانیلماسیدر . شوقدرکه نیچه سیسته ماتیک بر اثر یازمادینی ایچون اونی لایقیله آ کلامق ایسته یندر فکرلرینی ممکن اولدینی قدر بر منظومه حالنده طوپلامغه و بواشی یاپارکن مثلی چوق اندر ارلان شخصیتنک خصوصیتلرینی دوشونمکه مجبوردرلر . حالبوکه نیچه یی بویله تدقیق ایتمک آنجق فلسفی بر تربیه آلمش اولانلرک کاریدر . اونک جاذب اسلوبنه ، هیچ برشیئی خارج بیراقایان تنقید قدرته مقتون اولانلر ، یا خود بو کونکی مدنیتک اساسی کی کورونن قیمت حکملرینی تخریب ایدن غریب بر آدم کی مطالعه ایله نلرک چوغی اوکا بر فیلسوف کی باقمادینی ، فکرلرینی منظومه حالنده طوپلامغه نه وقتلری ، نه ده قدرتلری مساعد اولمادینی ایچون نیچه نک افکاری برچوق کیمسه لرجه حقیقی ماهیتله طانیلما یور . ده فناسی نیچه نک شخصیتی ، خصوصیتی تقدیر خصوصنده منقدر بعضاً تماماً بر برینه ضد حکملر ده بولونویورلر ، برینک بو فوق العاده ادمه اک یوکسک کوردیکی مزیت دیکری ایچون اثرینی تماماً قیمتدن دوشورن بر نقصان اولویور . نیچه نک وطننده کی بو متضاد کوروشی بیراقیکیز ، مثلاً اونک تقدیر ایلدیکی فرانسز عرفانه منسوب ایکی منقدر ، آمیل فا که ایله پالهرمس V. de Pallerès ک کتابی او قوییکیز [۱] ، فا که ایچون نیچه ده اک مهم اولان مزیت پالهرسه نظرأ « بوزواللی آدمی اضلال ایدن » بر نقیصه در . نیچه نک سجه سنه ویریلسی لازم کلن قیمت خصوصنده

[۱] فا که Enlisant de Nietzsche پالهرمس Le crépuscule d'une idole . بوصو کنجی

منقذ لر آراسنده بویه عظیم فرقلر اولونجه فیلسوفک فکرلرینی تقدیرده نه درجه اختلاف اوله جفی آشکاردر .

دیگر جهندن نیچه‌ک اثرلری عینی شرائط آلتنده وجوده کلش ، بربرینه باغلامش دکلدر . نیچه‌ک ایلک فلسفی فکرلری «Die Geburt der Tragaedie» نک ایچنده‌ایدی . اوزمان نیچه فیلولوژی مدرسیدی ، شوپنهاورک فلسفه‌سنه واغنه‌رک صنعتنه مفتونیدی ، صحتی برنده‌ایدی . فقط Morgenröthe, Der Wanderer und sein Schatten, Menschliches allzumenschliches ی یازدینی زمان دارالفنون مدرسلکنی و فیلولوژی‌ایله اشتغالی بیراقش ، اسکی مربیلرندن ، شوپنهاور و واغنه‌ردن آیریش ، صحتی تماماً بوزولمشدی . خسته‌لقه ، حتی بعضی زمانلرده اولومله مجادله ایدیوردی . ۱۸۸۲دن سوکرا یازدینی اثرلرده‌ایسه طرز اداباشقه‌لاشدی . واقعا اولکی اثرلرنده اولدینی کی بودورده‌ده زمانک اعتقادانه قارشى هجوم ایتمکده دوام ایدیوردی . فقط او هجوملرک ، اوشدتلی تنقیدلرک ، زمانک اعتقادلرینه و اونک مدافعلرینه قارشى دویدوینی حدت و کینی افشا ایله‌ین یازیلرک یاننده مظفر برروحک هیجانی کوزوکویوردی . نیچه اییشمشدی ، بعضاً هرکون اولومنی بکله‌ین فیلسوف نسبتاً صحته قاوشمشدی . خسته‌لق بو بویوک شاعر - فیلسوفه ایکی تورلو ظلم یاپدیوردی : برطرفدن آتیسنی قارارتیوردی ، دیگر جهندن اونک امثالسر غروری « خسته ادمک بدین اولمغه حقی یوقدر » پرنسپینی وضع ایتمشدی ، بو پرنسپیه صادق قالمق ایسته‌ین فیلسوف چکدیکی آجیلره ، عذابلره قارشى درین بر مقاومت کوسترمکه ، ارادی قدرتی هر آن آرتیرمغه مجبور ایدی . نهایت بو مجادله‌ده موفق اولدی ، حیات او قدر امنیتله کندیسنه ربط قلب ایله‌ین فیلسوفی مکافاتلاندیردی . خسته‌لقی نسبتاً مغلوب ایتدی . اوزمان فیلسوفده یکی برنشئه اویاندی . آرتیق اولکی دورلرده کی فلسفی قناعتلرینی کافی کورمه‌یوردی ، صنعتکار مخیله‌سی یکی بر « زردشت » یاراتدی . بو یکی اثر فوق‌البشر (Surhomme) ، عقیده‌سنی تعلیم ایدیوردی . فیلسوف بوضوک دور حیاتنده آرتیق بوسبتون پیغمبر اداسی آلمش ، بشریت ایچون یکی برمفکوره قویمغه چالیشمشدی .

نیچه عصرک اعتقادلرینه قارشى بعضاً مرحمتسزجه یاپدینی تنقیدلریله ، مثبت اولارقه‌ده بوضوک دور فلسفیسنده اورتایه قویدینی مفکوره‌لرله طانیلیر . فقط ۱۸۷۶ ایله ۱۸۸۲ سنه‌لری آراسنده یازدینی یوقاریده سویلدیکنز اثرلریله اورتایه قویدینی بر « معرفت نظریه‌سی » ، علم و حقیقت حقنده بر فلسفی کوروشی واردرکه اگر بونی اکمال ایله‌مش

اولسه‌یدی زمانز فلسفه‌سی « فوق البشر » نظریه‌سندن دها اهمیتلی بر اثر اولایلیردی .
 فیلسوف بودورده‌کی فکرلرینک پک چوغنه بالاخره هیچ تماس ایتدی . بوندن دولایی
 اولمالیدرکه نیچه‌نک فلسفه‌سی تدقیق ایدنلره فیلسوفک بودورده‌کی فلسفه‌سنه لازم اولدینی
 قدر اهمیت ویرمه‌یورلر . نیچه حقنده جداً عالمانه اثر یازان موسیو آندلر، کتابنک بر جلدینی
 فیلسوفک بودورده‌کی افکارینه تخصیص ایتدی . Rene Berthelot نك دارالفنون کتبخانه‌سنده
 موجود اولان Un romantisme Utilitaire اسمنده کی کتابنک برنجی جلدنده نیچه‌نک
 بودورده‌کی معرفت فکرینی تنویر ایده‌یلیر (Lichtenberger نك نیچه حقنده یازیلش اوفق
 کتابنده یالکز اوچ صحیفه بو دوره حصر ایدیلشدر . بو صحیفه‌لردن نیچه‌نک بو دورده علم
 و معرفت حقنده کی دوشونجه‌سی قاورانق قابل دکلر . Richard Mayer نك Nietzsche
 sein Leben und seine Werke سنده فیلسوفک بو دورده کی اثرلری برر برر تدقیق
 ایدیلدیکی ایچون قیمتلی برره‌خدمنی کورور . بونلردن استفاده ایلهرک نیچه‌نک ۱۸۷۲ دن
 ۱۸۷۶ ه قدر یازدینی اثرلره تبارز ایدن معرفت نظریه‌سی، بالخاصه بو نظریه‌نک قیمتلی
 جهتلرینی یازمغه جالیشاجم .

۱

نیچه ۱۷۷۲ دن سوکرده شوپنهاوردن ارتیق بستیون آیرلشیدی . حادثات علمی فوقنده
 بر ذات شی ، برنومهن ، بو ماهیتده بر اراده قبول ایله‌یه‌مه‌یوردی . ایلاک دور فلسفیسنده
 صنعت ویدیکی قیمتده دیکشیشیدی . « بکا آرتیق هیچ بر دین و صنعت لازم دکلر . »
 ده‌یوردی . شو حالد حقیقتی احساسلرده ، تجربه‌لرده ، خلاصه حادثه عالمنده آرامق
 لازمدی . بو اعتبارله نیچه « پوزیتیویست » اولمشدی . فیلسوفه کوره ناصل بشریتک
 تاریخنده دینک ، مابعدالطبیعی ملاحظاتک حاکم اولدینی دوروار ایسه فردده بو تکامل
 مرحله‌لرندن کچر . بو کونکی انساندها چوجوق ایکن دیندار اولور ، سوکر اما بعدالطبیعی
 نظریاته کندینی قاپدیریر ، بالاخره بو نظریات بدیعی اعتقاد ، صنعت اثرلرینه قارشی بر
 هیجان شکلنده تظاهر ایدر ، اک نهایت مثبت علم ارزوسی قوتله حاکم اولور ، او وقت
 طبیعتی ، تاریخی مثبت اصوللره تدقیق ایتک عشقی اویانیر . نیچه حیاتنک بو دورنده
 انسانیتک اک مکمل نمودجی بو مرحله‌یه واصل اولان انسانده یعنی علم ادمنده ، فردی

هر تورلو و هم‌لردن ، هر تورلو يا كليش دوشونجه‌لردن قورتاران فېكر ك سربستينده ،
كورويوردى .

فېكر ك سربستينى حادته عالمى فوقنده هر نوع اعتقادى ، هر نوع و هم‌لري آتمق ،
يعنى حقيقي معرفت الله ايله مك ، عيني زمانده مكتسب معلوماً تميزك حدود و قيمتى بيلمكدر .
سكرك بو سربستينى ، و حريتى بشريتده و فردده ناصيل وجوده كليور ؟ نيچه بونى
آراشديردى . بو تحرياتك استقامتى بالخاصه لامارق و داروهن سايه‌سنده اهميت كسب
ايدهن استحاله نظريه‌ي تعيين ايلمىدى

طبيعت عالمده استحاله Transformisme نظريه‌سنگ كشفى بوتون معاصرلرينى اوله‌يى
كى نيچه‌ي ده تهيج ايلمىدى . بوالمان فيلسوفى ده «حياتيات» ك تزقيسيه قوت آلان بو نظريه‌نگ
فلسفى تفكرلر يمزده آجدينى افق پك ابي كورمىدى . استحاله فكري يالمكز مادي عالمده ،
ذى حياتك مورفولوژيسنده ، بنيه و عضونده تدريجى تكمالى اورتايه قويمقلا قالامازدى .
بومبداً معنوى سجيه‌لر يمزكده ايضاحنه ياراردى . بناء عليه فيلسوفك بو صيرالرده انسانيتك
اك مكمل نمودجى اولارق قبول ايتديكى «فېكر سربستينى» نك ده استحاله مبدأى ايله
ايضاح ايديلمى لازمدى .

نيچه ايلك اول استحاله حقنده داروهنك فكرينه طرفداردى . عضويتك تكمالنده
داروهنك اضطفا قانوننك تطبيقى لزومنه قانعى . اونك ابچوندركه او زمان شوپنهاورك
فلسفه‌سيه داروهنك نظريه‌سنى برلشديرمكه چالشمىدى . فقط ۱۸۷۶ هـ دوعرى آرتيق
داروهنك نظريه‌سنى كافى كورمه‌مكه باشلادى . بال دارالفنوننده آرقاداشى روتيمير
Rûtimeyer حياتيات ساحه‌سنده فيلسوفه استحاله‌ي لامارق كى تفسير ايتمكى او كره‌تمىدى .
ذى حياتك استحاله و تكمالنده باطنى قدرتيه محيط آراسنده كى مناسبتيه اهميت عطف
ايدويوردى . اونك ابچون ذى حياتده كى باطنى قدرتك و اونی احاطه ايله ين محيطك ماهيتنى
تعيين لازمدى . بو احتياج نيچه‌ي اراده و معرفت حقنده يكي بر نظريه دوشونمكه مجبور
ايتدى . ديكر جهتدين علمك و اراده‌نگ بو صورتله روحى تحليلنى يامقلا فېكر حريتك
اساسى اولان حقيقت محبت و ذوقنك ، عقلى نظام و انضباطك ناصيل تولد ايتديكنى ده

ایضاح ایش اولاجقدی . چونکه استحاله اساسی قبول ایدیلنجه فرد و انسانیت ایچون
اک مکمل حال اولان فکر حریتنکده محیط ایله باطنی قدرت *Energie intérieure* ک
مناسبتندن تدریجاً تولد ایتسی لازمدی . نیجه بواسطه استحاله‌نک ناصیل اولدیغنی بولمغه چالیشدی .

۲

فلسوفه کوره شعورک ایلك اویاندیغنی محیط شکلسز بر قاثوس حالنده بولوندیغنی
قبول لازمدی . بالآخره وجوده کلن علم خارجی محیطک تبدیلیله مترافقدر . بناءً علیه
بزی دوشوندرمکه سوق ایدمن عامل خارجه‌در . نته‌کیم بعضی حادثات حقنده
تماماً خطالی اولارق دوشونورکن خارجه‌در حصوله کلن بر تنبیه خطایه مستمند اولان
یوشعورده تبدیلی تولید ایدمر . دیمک که معین حادثات قارشیدسندده تماماً یا کلیش دوشونجه‌لره
صاحب اولاییلورز . بزی خطالی تفکر دن قورتاران عامل بر تاثیر خارجی اولویور . ناصیل
شعورده معین فکر منظومه‌سنی آنجق خارجی بر تاثیر بوزاییلور ، دیکشدره بیلورسه
ایلك معلوماتک ینه بزه کلن حرکاتدن تولد ایتسی لازمدی . فقط ماهیتی مجهول قالان بو
تموجی حرکت *ondulation* ناصیل اولویورده بزده علم تشکیل ایدم بیلور ، ذهن وجوده
کثیره بیلور ؟ ناصیل اولویورده اولردن بر معنا چیقاریور و یکدیگرینه ربط ایلورز ؟ اگر
خارجدن کلن بو حرکت و اهتزازلرده یعنی اشیاده ذهنی ، ذکائی حصوله کتیرمن اساسلی
وصف بولونمادیغنی قبول ایدرسه ک بوروحی قوتک بزده ناصیل تولد ایتدیکنی آ کلا یا مایز ،
ذهنی ، ذکائی ایضاح ایلیمه‌یز . بناءً علیه علی‌الاطلاق حرکت موجه‌لرنده ، خلاصه ماده‌ده
ذکائی مندرج کور مکملکمز ضروریدر . شوپنهاور اشیاده اراده‌ی اصل اولارق قبول ایدیور ،
اراده‌نک بالآخره دماغ و ذکائی تولید ایتدیکنه قانع اولویوردی . نیجه بالعکس ماده‌ده
فطری اولارق « ذهن » ک موجود بولوندیغنی قبول ایدیور . شو قدرکه اشیاده‌کی ذهنی
قدرت بدایه شعورلی دکلدر ، تکاملله بو قدرت کندی کندی بیله‌جک حاله کلشدر .
بناءً علیه اولاً ماده‌ده ذهنی قدرتک ناصیل مندرج بولوندیغنی کوسترمک ، ثانیاً ناصیل بر
تکاملله انسانده شعور ا کتساب ایلدیکنی ایضاح ایتک اقتضا ایلر .

نیجه بودور حیاتنده ماده حقنده بوتون تفرعاتیله دوشونولمش و هر قسم‌نک دلیلی ذهنده
حاضر لاش بر نظریه مالک ذکادی . بالکمز اون سکزنجی و اون دوقوزنجی عصرک اک

ای فیزیق عالم لړینک فیکر لړینه اتباع ایدیوردی . شو قدر که بو فیکر لړی بعضاً یرلی یرنده قوللانمایور ، اکثریا ابرهام ایچنه کیرویوردی . فیلسوف ماده یی جانلی قوتلر انشعاع ایتدیرهن متعدد قدرت مراکز لری Centres d'energie اولارق تصور ایدیور . بو قوتلرک تاثیر لری بر یول تعقیب ایدمر . یالکز بو « یول یاخود استقامت » تعییر لړینه دقت لازمدر . بو تعییرلر بوراده آنجق مجازاً استعمال ایدیله بیلیر . چونکه یول واستقامت آنجق مکانک موجودیتیله قائمدر . بعد امکان ایسه شعور و تفکرک اثریدر . شو حالده « تفکر » ک موجودیتندن اول بعد تصور اولوناز . تفکر دن مقدم ویا اونک خارجنده تصور ایدیله جک بر قوتک هندسی بر صورتده تعین ایدیلنی قابل دکلدر . بناءً علیه هنوز شعور و تفکر تولد ایتزدن مقدم قدرت مرکز لرندن چیقان جانلی قوتلرک تاثیراتنک استقامتی دوشونه مه یز . فقط صرف مجازی و تقریبی بر معناده بو تاثیراتک بر یول تعقیب ایتدیکنی تصور ایلله بیلیرز .

بر قدرت مرکزینک اقتدار عملیسی واونک حرکتلرینه مقاومت ایله یی مؤثری ثابت عد ایدم جک اولور سهق او قدرت مرکزندن چیقان قوتلرک تعقیب ایدم جکی یول دائماً عینی اولور . تعییر آخرله میخانیک قاعده لری موجبنه قدرت مرکز لړینک صرف وبالا آخره داخلأ تجدد ایلدیکی قوتلری ثابت عد ایدم جک اولور سهق اونلرک قطع ایلدیکی یولی تخمین ممکندر . چونکه بو حالده بو قدرت مرکز لړینک عمللری دائماً عینی اولور .

بر قدرت مرکزی عملنک ثابت مانعه اوغرا دیغی زمان عینی طرزده یولندن دو نیمی بومانی طانیاسی ، بیلیمسیدر . مانع قارشیسنده یولی دکیشدیرمسی ده بر نوع « محاکمه ایتک » در .

بزم ایچون ماهیتی بیلنه میه جک اولان « قدرت Energies » لرک عمل و تاثیراتی حقنده میخانیکک اورتایه قویدیغی حقیقتلر برنوع استدلال وحافظه نک هیچ اولماز سه رشیم حالنده بو حرکتلرده موجود اولدیغی بزه کونستره جک ماهیتده در . فی الحقیقه بونلرده استدلال ومحاکمه وار ، چونکه مراکز قدرت موانع قارشیسنده یولی دکیشدیرمکی بیلور . حافظه وار ، چونکه اولجه چیزدیکی یولی تعقیب ایلله بیلور و مانعه یه تصادف ایدیجه اولجه پایدیغی حرکتک عینی یاپیور .

انسانده بوتون اعضاسیله ، حجیره لریله قدرت مرکز لرندن مرکبدر . بڑ خارجک تاثیراتیلله متأثر اولور ، بالمقابل معروض قالدیغمن تاثیراته قارشیی عکس عملده بولونورز .

دیگر بر موجودك تأثیرینه معروض قالمقلمزدر که بزده ایلک دفعه « علم » ی وجوده کتیرین .
 بو صورتله حصوله کن علم ، علی الاطلاق مادی « قدرت » لرده فرض ایتدیکنز محاکمه
 و حافظه کی غیر مشعوردر . شیمدی اصل مسئله شعورك ناصیل تولد ایتدیکنی ایضاح
 اید بیلیمکده در . فی الحقیقه ماده نك میخانیکیتندن حافظه واستدلال اثرلری فرض ایتک کوچ برشی
 دکادر . آنجق ذهنی اولان بو وصفلرک ماده ده موجودیتی « شعور » ی ایضاح ایده مز .
 بناء علیه اصل مشکل شعورك ناصیل تولد ایتدیکی ، باشقه بر تعبیرله ماده ده موجود بو علم ،
 محاکمه ، قدرتنک کندی کنندینی بیلدیره جک بر مابقیته ناصیل کله بیلدیکیدر . نیچه یه کوره
 شعور « حافظه » نك اثریدر . حافظه فیلسوفه کوره اساساً میخانیکی فعالیتده ده مظلم
 بر صورتده تشکل ایدر . بناء علیه بر عضوه محتاج دکادر . بالعکس ماده نك بر خاصه سی ،
 قدرت مرکز لرینک تکرر ایللرین عمللریله حصوله کنن بر اعتیاددر . هر ماده ده موجود
 اولان بو خاصه ، یعنی بر نوع اعتیاد ملکه سی بولونان حفظ اقتداری اعصابمزه قوتله
 واردر . بوئون اعصابمز اولجه پاییلان تجربه لری محافظه ایدر ، بیریکدیرر .

آنجق شعورك تولد ایتمی ایچون حرکت و تجربه لرینک محافظه سی کافی دکادر . ذی حیاتک
 کنندینی دیگر اشیادن آیرماسی لازمدر . نیچه یه کوره بو آریله یعنی انسانده بئلك و شی
 فکری شو صورتله وجوده کلیر : بدنمزی تشکیل ایدن قدرت مرکز لری یکدیگریله
 تماماً متساند بر کل تشکیل ایدر لر . حرکات تموجیه بو کلدن کچر لر ، تعبیر آخرله بوکل
 بو حرکتلری آلیر ، یاخود حرکتلر بورادن چیقار . بناء علیه حرکات تموجیه یکدیگرینه
 ارجاع قابل اولمایان ایکی مخالف زمره تشکیل ایدر لر . بونلردن بر قسمی عالم خارجییه
 عائد معنا و اوصافی اکتساب ایلر لر ، بونلر اشیایی تشکیل ایدر لر . دیگر بر قسمی ایسه
 متساند قوا منظومه سی تشکیل ایلر که بز بوکا « بدنمز » دیرز . بزدن کچن حرکات تموجیه
 Mouvements ondulatoires ایکی قطبدن چیقار کی کوزوکور ، باشقه بر تعبیرله ناصیل
 دمیر پارچه لری بر مقناطیس ساحه سنک ایکی قطبنده برر دائره چیزه لر سه بو حرکتلرده
 توجه ایدوب بالاخره آریلدقلری منبع و محراقلر وجوده کتیریر لر . بو قطبارک ،
 بو منبعلرک دائماً بری بدنمزی تشکیل ایدن « متساند قوتلر » ایچنده بولونور .
 بو اعتبارله ثابت و لایتغیر کورونور . بز بوکا « بئلك = moi » دیرز . دیگر منبع
 و قطبلر ده ازیاده متبدلدر ، بونلر « متساند قوا اولان بدنمز » خارجنده تمرکز ایلر .
 بونلرده « شی » دیرز . بر کره قدرت مرکز لرینک جریانیله قوتلرک منتهی اولدینی

و یاخود اورادن حیق‌دیغنی تصور ایلدیکمز باطنی بر منبع خیالی وجوده کلیمی آرتیق
 بزنی اک چوق بو علاقه دار ایدمر . چونکه تموجی حرکاتک چیزدیکی بو منبع بزنی .
 بو دائمی جریانک یا تاغنی ضبط ایدمر ، بئلك و شی قطبلرینی وجوده کتیره ن ایسه
 حافظه‌در . حافظه عینی خیالک image ماضیده ناصیل اولدیغنی ده کوسستمی صورتیله
 مقایسه‌یی ده تأمین ایلر . دیگر جهتمدن بزده کی قدرت آزالوب آرتاییلر . قدرتک آزالماسی و یا
 آرتماسی مفهومی بزده برر حکم Jugement وجوده کتیریر . قوتک آرتدیغنی و آزالدیغنی
 حس ایتمک سپینوزانک پک اینی کوردیکی وجهله حظ و سروری ، یاخود الملری وجوده
 کتیریر . بناء علیه حظ و الم منشأ اعتباریله ذهنیدر . هرتهبیج بدایه غیر شعوری اولارق
 ماده‌ده موجود اولان و بالاخره حافظه اعانه‌سیله شعورلاشان « ذهن Intelligence » ک
 اثریدر .

خلاصه نیجه کوره نه خارجه ثابت اشیا ، نه ده نفیده دائمی بر « بئلك ، انا »
 موجوددر . بالکمز اطرافنده دائماً سیال قدرت موجهلری بولونان مرکزله وارددر .
 ثابت قالان سنده‌جه بو آقیش طریزیدر . ایشته حافظه خارجا ثابت ولایتغیر کورونن بو
 آقیش طریزینی تثبیت ایلر . اونک ایچوندرك حافظه‌نک بز بالکمز قوتلرک قطع ایلدیک
 یولی خاطرلاتیر ، بویول اعتباریله قدرتلرک کچدیکی منطقه برطاقم عمل ساحه‌لری Champs
 d'action نه آریلیر ، بو صورتله حیز برطاقم پارچه‌لره بولونمش ، مکان حاصل اولمش
 اولور . هر قوت مرکزی آنجق بو معین بر پارچه اوزرنده مؤثریتی حس ایتدیریر .
 هر هانکی بریمز ایچون بو مرکزلدن بری « بئلكمز ، نفسمز » در . دیگر مرکزله ایسه
 بزم ایچون « اشیا » یی تشکیل ایدمرلر .

بویله اولونجه هیچ بر زمان مکنوناتی اولدیغنی کی ادراک ایتمک امیدنده بولوناماز .
 بز انجق بولوندیغمز نقطه‌دن اشیا حقنده بر نوع کوروشه مالک اولورز . بوگا
 رغماً بز دائماً متحرک ، دائماً متحول بر محیط ایچنده اولدیغمز حالدده کندیمنزی مستقر
 بر موجود فرض ایدیورز . ایلک و هممز نفسمنزی بویله لایتغیر ، ثابت بر وارلق ، بز
 جوهر عد ایتمک کمزدن باشلایور . حالبوکه بو وهم بر محله عینی زمانده قدرت موجهلری
 کوندر مکل کمزدن ایلری کلیور . حقیقته بو موجهلر خارجدن کلیدیکی حالدده بلسکمه‌ین بر مدت
 بزده تراکم ایتمش ، یاخود هیچ توقف ایتمکسزین سنده‌جه بزدن کچوب تکرار خارجه

کیتمشدر . الحاصل نفس ویا « بن » دیدیکمز مستقر بر موجود یوقدر . ایکنجی و همزده ماده ویا شی دیدیکمز خیالدری حقیقی و مستقر بر وارلق ظن ایتمکلکمزدر . حالبوکه اشیا اطرافمزده دائمی بر قایناشمه و جریان حالنده بولونان قدرتلرک بزدن کچن ویا انشعاع ایله ین قوتلره تصادف ایتدیکی زمان حصوله کلن بر وضع و حالدن باشقه برشی دکلدرد . ایشته نیچه علممزله نفسمز و اشیا آراسنده کی مناسبتی بویله دوشونویوردی . بالاخره پهرسپه قتیویزم Perspectivisme عنوانی ویریلان بونظریه‌یی نیچه هیچ بر زمان ترک ایتدی ، حیاتنک صوگ دورنده ده علممزله اصل وارلق آراسنده کی مناسبتی بویله بزم برنوع کوروشمز عد ایتدی .

بونکله برابر بز متموج و متحرک قوتلردن مرکب محیطه قارشی مؤثر اولدیغمزی ظن ایدیورز . بو ظن زه‌دن حاصل اولویور ؟ حافظه‌نک بزه بیلدیردیکی بو باطنی قدرته روحیاتده وریلمسی لازم کلن اسم نه اولابیلیر ؟ شوراسی محققدرکه خارجدن کلن تأثیرات بزده شکلی دکیشدیریر . نه لامسه‌نک ، نه باصره‌نک ، نه سامعه‌نک خارجدن کلن تأثیرات قارشیسنده انفعالی بر حالده قالاماز ، تعبیراخزله خارجده کی اهتزازات و تموجاتی عیناً نقل ایتمز . بویله اولونجه خارجه آرا مزده بر موازنه تأسیسی ضروری اولویور . بوموازنه‌نک اک غیر منتظم ، اک متموج شکلی تخیل Imagination حالنده واقعدر . هیچ اولمازسه شعوریمز نظرنده مخیله‌نک ایفا ایلدیکی وظیفه باطنی قدرتمزله محیط آراسنده تطابقدر . فقط بوانطباق تام اولمایور . تجربه بزه چوق زمان کوستیریرکه بو طرز انطباق حیات ایچون تهلیکلی ویا کلش عکس عمللرله مترافق اولویور . فقط بو صورتله معروض قالینان تهلیکله ، حسلریمزک تهدیر ایتدیکی یاره و آجیلر حقیقی انطباق ، یعنی اک دوغری عکس عمللر حقنده کیت کیده معلومات صاحبی اولمقلغمزه یارایور . بویله جه حافظه‌نک بیریکدیردیکی جکملر مخیله‌یی تصحیح ایدیور . ایشته اولجه یا کلش عکس عمللرک اویاندیردیغی فناقلرک خاطره‌سیله تصحیح ایدیلش و بعض قاعده‌لرله ضبط آلتنه آلینمش اولان مخیله عقلی وجوده کتیریر .

بناء علیه مخیله ایله عقل ماهیت اعتباریله یکدیگرندن آیری دکلدرد . آزالرنده آنجق درجه فرقی واردر . هر ایکسی ده مختلف شکلر آلمغه مساعد اولان و تأثیرلر قارشیسنده عکس تأثیر وجوده کتیرمیلن باطنی قدرتک برر صفحه‌سی ، باشقه باشقه تجلیسیدر .

مخیله قابا، حقیقته مطابقی اعتباریله تصفیه کورمه‌مش بر عقلدر . ابتدائی اقوامک بیلکیرنده و اساطیرنده اولدینی کبی . عقل ایسه خارجک تأثیراتیه تصحیحه اوغرامش بر مخیله‌در . فیلسوف ایلك اثرلرنده عنت و نتیجه ، یاخود جزء و یا کل کی مناسبتله کوره مفهومی‌ری ربط و توحید ملکه‌سی اولان عقلی مخیله‌دن بسبنون آیرمشدی . حیاتنک بو دورنده ایسه آرتیق بو ایکی ملکه آراسنده ماهیت اعتباریله فرق کورمه‌یور . محیطک تأثیریه قاعده آلتنه آلینان مخیله‌نک عقلی وجوده کتیردیکنی قبول ایدیور . نیچه‌ده بو تلقی طرزینک دیکشمسی صنعته قارشى بسلدیکی امیدى بیراقه‌رق پوزیتیویست اولماسنک طبیعی نتیجه‌سیدر .

بزدن کچن قدرت جریانلری میلان Penchauts لری تشکیل ایدر . وجوده کلن خیال Images لره فکرلر Pensé بو جریانک، یعنی طبیعی میلانلرک تعیین و ترسیم ایتدیکی شکل و صورتلردر . بو حالده خیال و فکرلر میلانلرک تثبیت ایدلمش خارجی حدودیدر . بونلر بو اعتبارله باطنی میللریمزک برر اشارتیدر . دیگر جهندن خیال و فکرلرده « کلملر » له افاده اولونور . بو صورتله کلملرده خیال و فکرلرک برر اشارتندن باشقه برشی دکلدیر .

۳

روحی بنیه‌مزی بو صورتله ایضاحدن سوکرا فیلسوف ایچون اصل مهم مسئله فکری ترقیاتک ناصیل ممکن اولدیغنی واولاجغنی، انسانیتک الک یوکسکک انمودجی اولان « فکر سربستیسی » نک نه صورتله حصوله کله‌جکنی تثبیت ایتمکدر . نیچه تکامل و استحاله مسلکینه صادق اولدیغنه کوره فکری ترقیاتیده علی‌الاطلاق تفکری وجوده کتیرهن قانونلره ایضاح ایتمک ایسته‌مسی طبیعیدر . ناصیل قانت اجرامک شیمدیکی حرکاتی اداره ایدن قانونلره اونلرک تکونتی‌ده ایضاح ایتمکه تشبث ایتمش ایسه [۱] نیچه‌ده برکزه ذهنی تشکیل ایله‌ین قانونلری اورتایه قویدقدن سوکرا اونک تکاملنی‌ده عینی اساسلره استناد ایتدیرمک ایسته‌دی . ذاتاً استحاله و تکامل مبدائی قبول ایله‌ین هر فیلسوف ایچون تعقیب ایدیله‌جک یول بودر . بناء علیه فیلسوفه کوره شعوری و علمی وجوده کتیرهن حافظه و مقایسه فکری تکاملاتی‌ده ، تفکرک یوکسکک درجه‌سنی‌ده ایضاح ایدر .

فی الحقیقه ذهنك یو كسك ملكه‌سی اولان ، بزده حقیقتی وجوده كتیزدن تعقل یعنی «كلامق» خاصه‌سی هر هانگی بر سبيله تصادف ایتدیكمز برشی قارشیشنده «میلان» لریمزك نه دیدیكنی صور مق و اونی ديكه مكدن باشقه برشی دكلدر . بناءً علیه یکی بر «شی» قارشیشنده قالدیغمز زمان بوتون میلانلریمزی و اولنك قوتلرینی واستقامتلرینی خاطر لایه‌رق کندي کندیمزی ديكه مك مجبوریتنده قالیرز . بز باطنی میللریمزدن و جریانلردن یالکیز برینه کندیمزی بیراقدیغمز زمان تطمین ایدیلش اولمایرز . چونكه هر میلانك متعا کسی اولان دیگر بر میلان موجود بولوندیغی کی بر طاقم میلانلرده یکدیگری اتمام ایلده جك ماهیتده در . شو حالده باطناً تماماً تطمین ایدیلکلكمز ایچون حساسیتیمزك بوتون تللرینك عینی زمانده اهتزاز ایتسی ، تعبیر اخرله بوتون میلانلریمزك آهنگدار اولماسی لازمدر .

حساسیتیمزی ، میلانلریمزی تماماً تطمین ایتمین بر فکر ایرکیچ بزم ایچون «حقیقت» اولمق ماهیتنی غائب ایدهرك رد ایدیلیر . شو حالده حقیقت *Vérité* میلانلریمزك هبسته لایو اولدیغی درمدر ، همه آیرموس صوریند بزی نظمین ابره یلیر بر فکدر . بویه بر فکر بوتون میللریمز آراسنده مقایسه ایدیلکی ، باشقه بر تعبیرله بزده و خارجه موجود اولانلر آراسنده ده دقتی بر تقدیری اقتضا ایدهر . هر یکی تأثیر اولجه حیات ذهنیه مزده بیریکمش اولان بوتون (image) لری تحریك ایدهر . اکر بونلر ذهن مزده جانلانماش اولسه لردی یکی تأثیر ذهنی قاپلار و مقابسه‌یه امکان قالمزدی . حالبوکه هر یکی حادثه ذهنك حیات ماضیه‌سی جانلاندریر ، اووقت بویکی تأثیر قارشیشنده یکی بزده‌نی تحوله دوغری کیتلمیمی بز سؤالی کندي کندیمزه صورارز . باشقه بر تعبیرله متعا کس بر خیاله ، یکی تأثیرك قیمتنی اسقاط ایده جك بر حکمله ، اعتیادلریمزك مقاومت و اعتراضیه او کمزده کی یکی شینك بزی سوق ایلدیکی ذهنی تحوله و اونك مترافق اولدیغی هیجانه مانع اوللمیمی بز ؟ سؤالی کندي باطنی حیات مزه صورارز و صوکراده بر قرار ویریرز . ایشته یکی بر وقعه قارشیشنده تماماً باطنی اولان بوسؤال استدلال *Raisonnement* ی تشکیل ایدهر . بو استدلالك صغراسی مواجهه‌سنده بولوندیغمز یکی تأثیردر . فقط بو تأثیر در حال ذهنمزك ماضیده اکتساب ایلدیکی تصدیق و حکملر آراسنده بر موقع اکتساب ایلر . ذهنك بو حیات ماضیه‌سی استدلالك کیراسنی وجوده کتیریر . نتیجه‌نی ایسه تمایللریمزك هیأت عمومیه‌سی تعیین ایدهر . بناءً علیه هر استدلال ، هر یکی حکم تمایللریمزك هیأت عمومیه‌سی اولان سجیه‌مزك بر طرزیدر . هر تفکر بوتون معنوی حیاتمزك بر وقعه‌سیدر .

شو چالده استدلالده بولونان شعورك درینا کمرنده بر طاقم غیر مشعور میلانلر، اشتها Opopêtit لر وارددر. واقعا مشعور اولان فکری حیات، اینان دیغمز حقیقتلر بو غیر مشعور میلانلری توزین ایدر سده هیچ بر زمان بو میلانلری اهل ایلیه مه‌یز. بالعکس هر فکری فعالیت بو مظلم تمایلاتک تأثیرینی و ایزلرینی بزه اخطار ایدوب دورور. اونک ایچون کیت کیده کنیش ودقیق مقایسه‌لرله روحی ملکه‌لریمزی طانیق مجبوریتنده‌یز. هر آن تفکرک ضیاسیله حساسیتیمزی امکان مرتبه‌سنده کنیش بر طرزده تنویر ایتمه‌ک چالیشمقلغمز لازمدر. واقعا مقایسه‌یه قادر اولان حافظه نفسمزک اکثر احوالده بو غیر مشعور اولان ساحه‌نده‌کی بعض قبار جقلری، التوالری بزه طانتدیراییلیر، شو قدرکه واضح اولان فکر دائمی بر تحول حالنده بولونان حساسیت دالغله‌لرینک آنجق ذروه‌لرینی ضبط ایدر. چونکه شعور حساسیتک یوکسک نقطه‌لرینی بزه کوستره بیلیر، اونیده کله‌لر اعانه‌سیله حافظه‌ده تثبیت ایلر. حالبوکه اون نقطه‌نک التنده بر طاقم جریانلر وار، بودالغله‌لردن هر هانکی بر صورتله یوکسلمش و یا خود منتظم بر حال المش اولانلری بیلسه‌ک بیله شعورك ایچ ودرین جهتی بزم ایچون مجهول قالیر. اولره بر اسم ویره‌مه‌یز، نته‌کیم تهیج‌لریمزک بوتون نتیجه‌سنی بیله میورز. شو حالده شعوریمزک واضح و صریح جبهه‌سی باطنی حیاتیمزک آنجق بر قسمیدر. واضح و صریح اولمایان حیاتیمز ایسه بزم ایچون شعورلی و مؤسس اولاماز. بوکار غماً مشعور اولان حاللریمز، بوکار مستند بیلکیلریمز «بالذات کندیمز حقنده‌کی قناعتی» تشکیل ایدر. بر کره بو صورتله شخصیتیمزه دائر بزه بر قناعت وجود بولدیمی، بو قناعت مقدراتیمز، اعمالمز اوزرینه مؤثر اولور. یکی بر فکره التحاق ایتمک، یا خود بر فکردن نفرت ایتلک ایچون بر سائق اولمغه باشلار. حالبوکه کندیمز حقنده‌کی شعور و قناعتیمز غیر مشعور میلانلری حسابیه قانمادیغی ایچون حقیقی سجیه‌مز خصوصنده آلدانا بیلیر، اونیده اولدیغی کبی بیلمه‌مک یوزندن چوق زمان یا کیملا. بیلیرز. اگر بزه حاکم اولمغه باشلایان بو یا کلش قناعتی، یا لکمز شعورلی حاللریمزدن چیقان فکری تصحیحیه چالیشماز سهق باطنی حیاتیمزده درین بر صیقینتی باش کوستریر. فقط ناصیل تصحیح ایده‌جکمز؟ تفکر خارچنده بر قدرتمز اولملی که بو یا کلش قناعتی تصحیحیه خدمت ایده‌بیلسین... بو قدرت آنجق ذهنه حاکم تأملی بر اراده اولاییلیر. حالبوکه نیجه اراده‌نک دهندن مقدم و اول اولدیغی و اوندن آیری بولوناییله جکنی قبول ایتیه‌ور. شوپنهاورک بو خصوصده‌کی فکری حیاتنک بودورنده رد ایدیوردی. بناء علیه شعورك بو آلدانیشنه، تام بر حقیقتک اکتسابیه

تاملی بر اراده‌ی مداخله‌ی ایتدیره‌مزدی . بو‌حاله‌ی ذکاتک اک یو کسک حقیقتی اکتساب ایتسانی ، بالذات فیلسوفک تعبیر نیچه « فکرک حریتی » باشقه طرزده ایضاح ضروریدی . نیچه‌یه کوره شعورک بو آلدانیشنک ناصیل تصحیح ایدیله‌بیله‌جکنی ده‌ا دوغروسی ناصیل بر قوتله حقیقتی اکتساب میلی اویاندیغنی ایضاحدن اول فیلسوفک اراده‌حقنده فکری آ کلامغه چالیشام .

۴

نیچه نظرنده اراده نه بسیط بر روحی حادثه ، نه‌ده شوپنهاورک فرض ایلدیکی کبی اصلی برواقعه‌در . بالعکس مونته‌نیک ، سینوزا کبی بعض راسیونالیست فیلسوفلرک قبول ایتدکری وجهله استدلال و محاکمه ایله قاریشیق و مشتق بر دته‌در . بز بر کره شونی تسلیم ایتلی‌زکه افعال بشریه‌نک ناصیل وجوده کلدیکنی بیلمه‌یورز . اعمالم‌زک صورت حصولی حقنده بیلدکاریمزده اونلری ایضاحه قطعاً کافی دکلدر . حرکتلریمز شعوریم‌زک بزه بیلدیردیکندن تماماً باشقه صورتله حصوله کلیور . فزیکک و روحیاتک ترقیسیله آرتیق اصل ماقعک ، اصل اشیانک حسلریمزک بیلدیردیکندن آری اولدیغنی نظره آلمغه آلیش‌دق ، بوکون هیمز بیلورزکه صدا ایله خارجه اولان تموجات هوایه یکدیکرینک عینی دکلدر . بونک کبی روحی حیاتم‌زکده ، بناء‌علیه اراده دیدیکمز فعلک‌ده شعور واسطه‌سیله تماماً بزه معلوم اولاندن ده‌ا باشقه تورلو اولدیغنی قبوله الیشمالی‌ز .

باطنی حیاتم‌ز برطاقم اشتها‌لرک ، Appêtit و میلانلرک مدوجذرندن مرکب‌در . بو میلانلرک خارجا کورونوشی اولان بدنم‌زده « بشره » دیدیکمز جلد طبقه‌سی وازدرکه دیگر بر شیه تماس ایتدیکی زمان تنیه ایدیلش اولور و یوقاریده نسویدیکمز کبی اک قوتلی علممز بو تماسدن تولد ایدر . فقط عینی زمانده بو میلانلر تطمین ایدیلک ایستهر . شو قدرکه بز نه ایله بونلرک تطمین ایدیله‌جکنی بیلمه‌مز . هر لون بیکارجه وسیله بو سوق طبعیلریمز اوکنه برطاقم شکارلر آتار . بز اعضام‌زی بو شکارلری ، سوق طبعیلری تغذیه ایدیله‌جک اولان بو غدالری آلق اوزره اوزاتیرز . احتمالک تمایل و اشتها‌لریمز بو اشیا ایله تطمین ایدیلر ، فقط چوق زمان بو میلانلر ، بو سوق طبعیلر بر تورلو تطمین ایدیله‌مز ، دائماً آج برحاله‌کندینی دویوراجق ، تسکین ایلله‌جک اشیا آرار . حتی

اویله سوق طبیعیر اولابیلیرکه بونی بولاماق یوزندن بوسبتون قورور. تطمین ایدیلهمیهن سوق طبیعیر، اشتها ایه کنه کنه تسکین ایده جت اشیا تخیل ایدر، مخیله انطباقه یعنی تطمین ایدلمکه جهد ایدر سوق طبیعیرک فکرلر و خیاللر حاله کلسیدر. بونک ایچون دنیله بیلیرکه اشتها Appetit مخیله نک معرفت ساحه سنده افاده ایلدکلرینک حیات عملیه ده تجلیسیدر.

فقط انسانده معرفتدن مجرد و اوندن تماماً آیری عمل طرزی موجود دکلر. بناء علیه حیات عملیه مزده سوق طبیعیرک، میلانلرک افاده سی اولان «اشتها Appetit» لرده ذهله قاریشلر. قی الحقیقه اشتها نک تطمین ایدیلهمیه مسندن تولد ایدر و «ارزو» ایلد افاده اولونان بوشلق بزده الم تولید ایلر. برالم ایه بریوقلغی، باشقه بر تعبیرله حیاتی قدرتک آزالماسی تقدیر اولماسی اعتباریه بر حکم Jugement دکلدر؛ دیگر جهتدن تمایلاتک عدم تطمیندن تولد ایلرین الم بزی بوصیقینتیدن قورتاراجق وسائط حقنده دوشوندیرمکه مجبور ایدر. ده اول بو ویا بونک کی برالم دویدیغمز زمان بعض واسطه لرله تطمین ایدیلش و بناء علیه بر ذوق و حظ دویمش اولابیلیر. او حظ حافظه ده یرایتمشدر. بناء علیه حافظه اولکی تجربه لر استناداً بوالمی ازاله ایدر جک اشیا نک خیاللرینی شعوره سوق ایدر. سوق طبیعی اولجه بزی تطمین ایتمش اولدیغنی خاطر لادیغمز اشیا اوزرینه آتیلغمه بزی سوق ایلر. اکر بوالمی ازاله ایلر جک، تمایلی تسکین ایدر جک برغدا بولامازسه اونی تحری و تحقیقه قویولور. بویله جه حاله دویدیغمز قوتلی میلانله اولجه بوکی تمایلاتی تطمین خادام اولان اشیا نک خاطر سنی یکدیگرینه ربط والصاق ایدر. مثلاً بر آدمه «سنی سویورم» دیمه نک حقیقته معناسی شودر: «باطنی حیاتمه برشی وارکه سویور، بوسوکی بنده شو فکری اویاندیریور: یالکز سن بو محبتی تطمین قادر سک». بریسی حقنده دویدیغمز عشق و محبتلر بویله بر حکمه مربوطدر. حتی بو حکم نه قدر قوتلی اولورسه، نه قدر سوکیمزی تطمین ایدر جک شیئک یالکز سویلندن باشقه سی اولامیه جغه تعصبله اینانیرسه عشق ده او قدر قوتلی اولور. کورولویورکه سویلن بر هدف، برغایه دکل، سوکی تطمین ایدر جکنه حکم ایلدیگمز بر واسطه در. فقط ذهنی رؤیت بو واقعیه ی اکثریا عکس ایتدیررک بزه کوستریر. یعنی سویلن شی صرف سوکی تطمین ایتمه بر واسطه دن عبارت ایکن بزه الیه ایدیلشی ضروری برغایه fin کی کلر. خلاصه ایچمزدن حس ایتدیگمز بر یوقسوللق، بر صیقینی،

بوگا مرادف اولان الملی برهیجان بوکی زمانلرده بزده حظ تولید ایدمن اشیانک خاطر می ایلله، یاخود ینه بویله حظ او یاندیراجغنی ظن ایلدیکمز اشیانک خیالی ایلله برله شیر، ذهنی بر حکمله هرهانکی بر شیشی الله ایتمکی لازم کورورز. بویله جه تمایلی، اونی تطمین ایدمن اشیا، باطناً دویدیغمز آرزویی غایه فکرینه ربط والصاق ایلارز. اوزمان بو غایه طرفزدن ایسته نیلمش و بولونمش کی اولور. بوندن ده انسانک و انسانیتک اک مهم و همی اولان حریت، اختیاره مالکیت فکری دوغار.

بوايضاحات کوستیرکه برشیشی دوشونهرک، ترجیح ایللهرک ایسته مک قدرتی بروهمدن باشقه برشی دکدر. چونکه بویله براراده اولاً بر مقصدی، ثانیاً اومقصدی استحصال ایچون لازم کلن یولک تعیننی اقتضا ایدمر. حالبوکه کرک بومقصد، کرک بو یول حافظه نک تجرید ایدهرک بزه تصور ایتدیردیکی بر مفهومدر. بر کره کیدیلن یولی تماماً احاطه ایدمه یز، بزم غایه واصل اولمق اوزره قطع ایلدیکمزی فرض ایتدیکمز یول ایچنده حقیقته اوغرا دیغمز بر طاقم قسملر احاطه من خارجنده قالیر. دیگر جهتن هدفه واصل اولونا بیلیر. فقط بو هدف اولدن ظن ایلدیکمی کی دوشونه، طاشینه ایستمنش دکدر. ذاتاً مقصده وصول حاصل اولان نتیجه نک آنجق جزئی بر قسمیدر. تمایلاتمک بزه تصور ایتدیردیکی هدفه سوق ایدمن قدرت دالغهلری متبادیاً بزدن حقیقه مقده، یاخوددها زیاده بزنی دولدر مقده دوام ایدمر. اونک ایچون منتهای کی کوردیکمز نقطه ده دورامیز، اوندن ایلریسنه ده آتیلیرز. دیگر جهتن استهداف ایلدیکمز هدفه واروب و ارامیه جغمزی ده اولدن بیله مه یز. اراده من دائماً متردد تجربه لرله قوتمزی دهنر. ناصل یلکنلی کمی سیری ایچون مناسب هوا جریانی بولمغه جالیشیرسه اراده مزده مساعد جریان بولمق ایچون تجربه لر یاپار.

خلاصه بر کره مقصده آنجق مساعد بر جریان بولونورسه واصل اولونا بیلیر، دیگر جهتن بزنی احاطه ایدمن قدرت دالغهلری دائماً غایه و منتهای عد ایتدیکمز نقطه یی آشمغه سوق ایدمر. بوندن باشقه بر ترجیحندن اول تعقیب ایدیله بیله جک بر چوق هدفلر دوشونورز. بزم تحقق ایتدیرمه دیکمز حالده دوشوندیکمز بر چوق شیر واردر. حافظه نک بزه بر چوق هدفلر دوشوندیرمی بونلردن برنی ترجیح ایتک قدرتنده اولدیغمز ذهانی، بناء علیه اختیار ایچون بر زمین بولوندیغنی قناعتنی تولید ایلر. حالبوکه بویله بر اختیاریمز یوقدر. بور سرابدن باشقه برشی دکدر.

او حالده مختلف غایه‌لردن برینی ترجیح ایتک قدرتنده بولوندیغمزی زه‌دن ظن ایدیورز؟ فی الحقیقه بز مختلف غایه‌لر آراسنده تردد ایدیورز. فقط بو حال حقیقی اقتدارمزی، یعنی نه‌ی یا پیغمه قادر بولوندیغمزی بیلیمه‌مکدن ایلری کلیور. بزم مختلف غایه‌لردن برینی انتخاب ایتکده حقیقی عجزیمز واردر، بو خصوصده مختار اولدیغمزی ظن ایتک‌لکمزک سببی مختلف غایه‌لری تخیل ایلرکن اراده‌نک بر طرفده ذهنه هیچ مداخله ایتیه‌رک بکله‌مسندن ایلری کلیور. بز ارادی فعللرک شو صورتله اولدیغنی ظن ایلایورز: اولاً مختلف سائقلر مجادله ایدیور، بزم باطنی قدرتیمز بو سائقلری عینی قطعیت و قوتله طوتدیغنی حالده سائقلر آراسنده توازن اولویور. اووقت منظم بر قدرت اراده‌مز اوزرینه تأثیر ایدهرک مادی و معنوی شخصیتیمزی تشکیل ایدن متساند قوتی، یعنی بز بر استقامته توجیه ایلایور. حقیقتده ایسه مختلف سائقلردن هیچ برینک قوتی آرتیرمق اقتدارینه مالک دکاز.

واقعا نیجه سائقلر آراسنده بر چارپیشمه اولاییله‌جکنی افکار ایتیمز. آنجق بو چارپیشمه‌نک بزجه مشهور اولمادیغنی، ونک غیر مشهور ساحه‌ده وجوده کله‌بیلیمه‌جکنی قبول ایدهر. اسکی بر اعتیاد، کیزی بر نفرت، نفسمزک بزجه بیلیمه‌ین بر جاذبه‌سی، محیله‌نک آنی بر تأثیری، بر احتیاضک بردنبه‌ه اوپانسی، خلاصه بزم بیلیمدیکمز و حسابیه قاتمغه مقتدر بولونمادیغمز تأثیرات حرکت‌اشناسنده قرارلریمزه دائم‌اؤثر اولور. بز تذکر ایتدیکمز عملک محتمل نتایجی مشهور بر صورتده دوشونور، دیگر ممکن اولان حرکتلرک نتیجه‌لرله مقایسه ایدهرز. فقط بو اثناده قرار شعوریمز خارجنده‌کی بر ساحه‌ده یوقاریده سویلدیکمز غیر مشهور مؤثراتک مداخله‌سیله تحصیل ایلر. ایشته حرکتیمزک محتمل نتایجی اوزرنده دوشوندیکمز صیراده سائقلر آراسنده‌کی چارپیشمه‌نک مشهور اولان قسمی آنجق قرارک عامللرندن بر جزءدر. قراری تولید ایدن اصل مهم مؤثرات واونلر آراسنده‌کی اختلافی غیر مشهوردر. ناصیل بر قوماتدان بوکسک بریردن اردوسنه باقارکن کوردیکی قسمک ایلرله‌مسی ویا کریمه‌مسی ظفری حکم ایتکه کافی دکلسه، ناصیل اوقسم خارجنده‌کی جزءلرک ایلرله‌مسی ویا کریمه‌مسی ده غلبه ویا مغلوبیتی تأمین ایدمبیلیرسه شعوریمزده ارادی افعال اشناسنده آنجق جزئی بر قسمی بیلیر، حالبوکه بزم کورمدیکمز قسمده، یعنی غیر مشهور حیاتیمزده اولوب بیتهلردرکه نتیجه‌ی تقریر ایدهر.

کندیمزده حریت دیدیکمز بر قدرته، حرکاتمز حاکم اولاییله جکمز دائر و هممزك بر منشائی ده بعضی اعمالك بعضی تصورلری منتظماً تعقیب ایله سیدر. بعض تصورلردن صوکر بعض حرکتلر منتظماً ظهوری بزه اعمالمز تخمین ایتدیریر، اکثریا تجربه بوتخمینه توافق ایدر. شدتلی براحتراض ایله حرکت ایدن آدام کندینی حر عد ایتمز. اکثریا یاپدینی حرکتیه کندیسی ده حیرت ایدر، کندیسی احتراضك اسیری کورور. فقط بویله آنی احتراض اثری اولمایان افعالی تخمین ایده بیلدیکمز ایچون اولره حاکم بولوندیغمیزی ظن ایدیور. بو صورتله مستقبل حرکتلری بیلدیکمز ایچون موهوم بر قدرته مالکیتمیزی استدلال ایله یورز. فقط استقباله کی حرکاتمز تخمین ایتمکدن اعمالمز حاکم اولغی استدلال بر سفسطه اولمازی؟ فرض ایدیکمز که بر ادام کونشك دوغما زمانی قالفوبده «بن ایسته یورم که کونش دوغسون» دیسه هیمز کوله رز. واقعا اوزمان کونش دوغار، آنجق اودامك ایسته مه سیله دکل کندیلکمدن دوغدیغنی بیلیرز، اونك ایچوندر که طلوع زماننده کونشه «ایسته یورم که دوغسون» دیسه نه کولر ودلی دیرز. کندی افعالمز حقنده ده «ایسته یورم ده اولویور...» ده مك بوندن فرقلی دکلدر. بوده اوقدر و همدر. چونکه بو حالده ده مستقبل افعالمزی اولدن بیلدیکمز ایچون کندیمزده موهوم بر قدرت فرض ایدیورز، واقعا عالمده کی اطراد خارجی حادثه لری و کندی افعالمزی اولدن بیه بیلیمك قدرتی بزه تأمین ایله یور، فقط بوکا باقهرق اعمالمز حاکم اولدیغمز حکم ایلمکمز دوغری اولابیلیرمی؟

کوردیکمز اطراد وتوالی نهایت بر تسلسلدن باشقه برشی دکلدر. کندیمزی بونك قارشیسنده حر ظن ایتیمك بو طبیعی تسلسلی ساده جه قبول ایتمکدن، تحصیل ایده جکنی اولدن بیلدیکمز عمله موافقت ایتمکدن عبارتدر. حریت حقنده کی بو تحسسه ذهن بوتون غیر مشعور حیاتمزله برابر چالیشیر. فی الحقیقه ذهن بر کره خاطره اعانه سیله هر هانکی بر تصویری تعقیب ایلیه جك اعمالی وجوده کلزدن اول بزه بیلدیریر. بزم بو عمله موافقتمز بوتون تمایلاتمز بونی قبول ایتدیکنه دلالت ایلر. بونك ایچوندر که هر فرد حیاتی قدرتنك بولوندینی جهه ده حریتی حس ایلر. نته کیم بعضی مزاجلر حریتی احتراضلرده، بعضیلری وظیفه اطاعتده، بعضیلری علم احتیاجنده، بعضیلری ده کور هوسلرده بولور.

کورولویور که اراده مزه عطف ایتدیکمز اوصاف بر حکم خطا سیدر. بر باطنی حیاتمز تعیین ایدن اسبابی بیه میورز. حال ایله ماضیده کی شرائط آراسنده مماثلت فرض ایتیمکمز

وبوکا استناداً ماضیده کی حرکتی یابمغه تماماً قادر بولونديغمزی ظن ایتمکلکمز هپ برر و همدر . بر برینه تماماً بکزه‌ین ایکی روحی حال موجود دکدر . انسانک اعمالنی تولید ایدن روحی شرائطدن، تجرید ایتمکه‌ده هیچ امکان یوقدر . شأیت Réalité دائمی قدرت جریانلرنندن عبارتدر . بئلکمز بو جریان ایچنده موقع آلیر و اطرافده کی تموجات کندینه دوغری کلیر و صوکره خارجہ دوغری چیقار کی کورونور . حد ذاتنده بوجریان هیچ دورماز ، دائماً آقار بر حالده در . بزداثما متحول اولان بودالغهلرک آنجق اک اوست ، اک ظاهری قسمی تثبیت ایده بیلیرز . شأیت بویله دائمی تحول ایچنده اولونجه حال ایله ماضی‌نی مقایسه ایدهرک اوندن الم ویاسرور ، وجدان عذابنی ویا تشجیع ایچون وسیله بولمغه قالمق بیهوده در .

خلاصه ذهن حریتہ مالک اولدیغمز ، اعمالمزہ حاکم بولونديغمز و همنی اویاندریور . شو قدرکه بو قناعت‌ده اولمادجہ یعنی یکدیگرینه بر اطرادله باغلی اولان خارجی حادثات قارشیسنده حریت اعتقادی بولونمادجہ حقیقی شخصیت تشکل ایده مز . انسانی حیواندن فرق ایتدیره‌ن، ایسترسه و هم اولسون، بو حریت قناعتدر . بوتون مدنیتلر، بوتون انقلابلر حر اولدیغمزہ، بناءً علیه معین غایه‌لری تعقیب ایله جکمزہ اینانما مزدن دوغمشدر . حالبوکه نیچه بویله حر عمل قناعتنی ، معین غایه‌نی تعقیب ایده بیلمک قدرتی یالکمز و هم عدایمه‌یور ، بونی غیر قابل ادراک بولیور . او حالده بشریتک آتیسنی تهله‌کیه دوشمزمی ؟ بر غایه و هدفی تعقیب ایتمک قدرتنده اولمادیغمزہ اینانیرسه‌ق یوکسک برمفکوره پیشنده جهدایمکه ، حق بیلدیکمز غایه‌یه دوغرو کیتمک ایچون قدرت صرفه امکان قالیرمی ؟

مادام که بر غایه تعقیبی قدرتی حائز دکمز ، مادام که پرسپه‌قتیویزم نظریه-سنک ایجابی اوله‌رق ماوقعله، شأیتله دوغروندن دوغرویه تماسده دکمز . او حالده بالذات، نیچه‌نک بشریتک اک یوکسک انموزجی اولارق تصور ایتدیکی « فکرک حریتی ، مفکوره‌سنی ، حقیقت عشقنی ناصیل بسله‌یه بیلیرز ؟

بونقطه‌ده نیچه‌نک اک شایان دقت بر نظریه‌سنه، « حقیقت » ک ماهیتنه ، حقیقت عشقنک پیسیقولوژیسنه دائر اولان اک اوریژینال کوروشنه تماس ایدیورز . یوقاریده‌ده سویلدیکمز

کې اوزمان فيلسوف بشریت ایچون برتک سلامت نقطه‌سی کوروپور : هر تورو و هم لردن قورتورلمق ، حقیقت ذوقنی تمیه ایدمرک خیرکار اولسه بیله هیچ بر یالانه مساحه ایتمه‌مک ، تسلیتکار اولسه‌ده ذکا دارلغندن دوغان فکرلری استحقر ایلمکدر . بو نوع ذهنی نظام ایله حقیقی برحریت اکتساب ایدمرز که بو، اراده‌مزه حاکمیت ادعای کبی محال برحریت دکل، بلکه یا کلش فکرلردن ، و هم لردن قورتونقندن متحصل بر «سربستی» فکر» اولور .

عجبا بوغایه‌یی استحصال قابلمیدر ؟ انسانک و قتیله تابع اولدینی و هم لردن جاذبه‌سنی غائب ایتک یوزندن بزده تولد ایدمن حقیقت عشقی ده نهایت ر قوروتتی ، بر وهم دکلمیدر ؟ حقیقت یوقاریده کی ایضاحه نظراً بزم اراده‌مزله تعقیب ایلدیکمز بر مفکوره اولاماز . اوحالده ناصیل دوغویور ؟ نیچه‌یه کوره حقیقت ذهن تکاملنک اک صوک محصولیدر . ناصیل معضل و دهامترقی عضولر دهامبسیط اولانلردن صوکر تولدایدیورسه حقیقت‌ده اوزون زمان کچن خطالری تعقیب ایلر .

واقعا بزم ایچون پرسپکتیویزم Perspective ک شرائطندن قورتولمق قابل دکلدرد : هر بریمزک اوکنده آنجق دار بر ساحه وار . بو ساحه داخلنده کنی بیله‌بیلیرز . بونلری ده بو ساحه داخلنده کی وضعمه کوره تقدیر ایده‌بیلیرز . دیگر جهندن حسلریمز بزی کندینه کوره اوילה بر آغ ایچنده حبس ایتمشدرکه بو آغ هیچ بر زمان حقیقی عالمی اولدینی کبی کوستره‌مز . حالبوکه بزده آنجق او آغ ایچنه دوشن شیلر حقنده معلومات ضاحی اولابیلیرز . خلاصه ماقعی ، شأنتی اولدینی کبی بیلیمکه بزی یوکسلته‌جک هیچ بر قوت یوقدر . شو قدرکه ادرا کی کیت کیده کنیشتمک ، مقایسه‌یی کیت کیده آرتیرمق صورتیله اشیا اوزرنده حاکمیتی آتیریرز . بویله یاپدقی ، اسکی و هم لردن انحلال ایدمر . کورولویورکه حقیقت اکتسابی ایچون یکی بر یول یوقدر . و هم لردن ، خطالر ناصیل ونه یولده حصوله کلیورسه حقیقت‌ده عینی اصول ایله تحدت ایدمر . شو قدرکه اعمالی هر جهته تشمیل وتوسیع ایلک ، اشیا اوزرنده کی قدرتمزی هر طرفده آرتیرمق ایسته‌دجکه اسلیدن حاصل اولان و هم لردن پارچالانیر ، و بو پارچهلر بر برینه متناقض اولدینی ایچون یکدیگرینی احما ایدمر . بناءً علیه بزم اعمال و حرکت واسطه‌لرینک قدرت وتأثیرلرینی آرتدیرارق محیطه تدریجاً انطباق جهدیمز خطالرک تصحیحنه یارارکه « حقیقت » ده بوندن دوغار .

حقیقت اعمالنك قدرتی آرتیرمقدن تولد ایتدیکنه نظرأ اول امرده اونی قبول ایدن انسانك حیاتی تأمین ایتسی ایجاب ایدر . شو قدر که برکره و همکرده بو وظیفه‌ی کورور . خطا و و همکرده چوق زمان برنوع انطباقه یارار . دیگر جهندن حقیقتك فردہ بو خدمتی ده محقق دکلدر . او حالده حقیقتی و همدن ناصیل آیرا بیلیرز ؟ بر فکرك حیاتی قدرتمزی آرتیردیغندن ناصیل امین اولا بیلیرز ؟ بو خصوصده کی حکممنك دوغری اولدیغی نره دن معلوم ؟ بوندن باشقه شعوریمز نظرندہ یالکیز فردی حقیقتلر وار . فرد ایچون قدرتی آزالتان ، اونی محو ایله‌ین هرشی حقیقتہ مغایر اولماسی لازمدر . چونکه بو خارجی محیط ایله یا کلش مناسبتده بولوندیغمزی کوستریر . آنجق فردایچون بویله مخرب ، فقط جمعیت ایچون فائده‌لی اولان حقیقتلرده وار .. شو حالده فرد اعتباریله حیاتی تخریب ایتدیکی حالده جمعیت ایچون فائده‌لی اولان فکرلرده حقیقت ده یه بیلیر ، اونی تعقیب ایله یوروز : بو حالده ناصیل اولویورده آنجق بزه نظرأ قیمتی تقدیر ایله یه یله جکمز بر فکر اجتماعی بر قیمت ده اکتساب ایدیور ، یا خود اجتماعی قیمتی حائر بر فکر ، بر حقیقت آرقاسنده ناصیل قوشویوروز ؟ نیچه کرک بودورده ، کرک صوگ دور فلسفیسنده فردی بر فکر دن ناصیل یکی بر اجتماعی فکره بوکسلینه ییله جکنی ، فرد اعتباریله اک دوغری اولان بر فکرك ناصیل اجتماعی قیمتی اولاجغنی ایضاحه اوغراشدی .

فیلسوف بودورده شو صورتله دوشونویوردی : ایلک شعور هیچ شبهه یوق که فردیدر ، یعنی ذهن ایلک اول آنجق « بئلك - انا - moi » دیدیکمز باطنی ضیائی احاطه ایده بیلیر . بزم تأسیسه چالیشاجغمز ، یا خود تأسیس ایتدیکمز ایلک مناسبت « نفس ، بن » دیدیکمز مرکز باطنی ایله اونی احاطه ایله‌ین اشیا آراسنده اولابیلیر .

بز ماهیتنی بیلمدیکمز شأنیته مناسبتده بولونمغه مجبوروز . واقعا حواسمنك بزه بیلدیردیکی معطالر وار ، فقط بونلر اشیانك یولمز اوزرنده کی کولکه‌لریدر . اعمال احتیاجیله شأنیتی قاورامق جهدی بزه حکملری واستراللری وجوده کتیریر . بو حکملردن حیاتی محافظه ایدن ، انکشافنه یاریم ایله‌ینلری حقیقت عد ایله‌رز . بونك ایچوندرکه ماضیدن انتقال ایدن فکرلر قوتلی اولور و بزه دائماً حقیقت کی کورونور . بونلرک اسکیلکی حیاتی قوتنه دلیل اولور . چونکه بزی یکی وقاراکلق یوللرده تهلکه‌لی تجربه‌لر یا عمقدن قورور . شأنیته عمل احتیاجنك تولید ایتدیکی تماسزدن دوغان اسکی فکر و حکملرک حیاتی ادامه

ابتدیکی اولدن بزه معلومدر . او حالدی یکی بر طریق طوتهرق تهلهکله آتیلیمق کوچ کلیر ، بونک ایچوندرکه بزه قالسه بوغنههوی فکرلر ، ماضیدن منتقل اعتقادلر دوام ایدوب کیده . آنجق مادی واجتماعی محیطمز دکیشیور . محیط دکیشنجه اسکی فکرلر انطباقمزی تأمین ایده میور . ذاتاً بز بودکیشکلک قارشیسنده دائماً محیطمزه فنا انطباق ایتمش ، راحتسز بر حالدی بولویورز . بو حال یعنی ده ائی انطباق ایتک جهدی خطاده اولسه ، یکی فکرلر تولید ایلکه بزی مجبور ایدیور .

بو صورتله بزه یکی فکرلر ابداع ایلک ضرورتی اسکی فکرلرک بنیه سنده تعدیلات یاپیور . بوتعدیلات هیچ شبهه یوق که ، المله ، صیقینتی ایله مترافق اولویور . فقط محیطک دکیشمسی ناصیل محیط ذی حیاتک بنیه سی ، مورفولوژیسی دکیشدریورسه تفکرک بنیه سی ده استیحاله یه مجبور قیلیور . بو استیحاله صیقینتیسز ، عذابسز ، حتی قان دو کولمکه سزین اولماز . بر طاقم فردلر بو استیحاله یه قولایلقله تابع اولامیهرق چیقماز بریوله کیره لر . بر طاقملرینک قدرتی فضله اولور ، او وقت سرعتله انکشاف ایدر ، محیطه او یامازلر ، بر طاقملری حیاتی شرائطک کنیدیله یه اجبار ایتدیکی تکاملده کچیکیرلر ، او وقت یاشایامازلر ، اولورلر .

خلاصه تفکر تبدل ایدن مادی واجتماعی محیطه انطباق ایچون بر جهده کیریشمکدر . بو جهده ده ها دوغروسى مفکره نك مجبوراً آتیلدینی بو یول تهلهکله ره دولودر ، اک ایی انطباق ایچون جهده ایدن متفکرلر بعضاً دویدقلری آجی یاره لرله فریاد ایده لر . حتی اولومی ترجیح ایلرلده

یا دنیا یه کلسه یدم ، یا عقلم اولماسه یدی

دیرلر . شو حالدی ابداعکار فکرلر تولید ایله یین شخصلرک مقدراتی بویله الیم اولونجه حقیقتک نه قیمتی قالیر ؟

نیچه وهملری ، یا کلش اعتقادلری ییقان فردلرک معروض بولوندینی بوتهلکه لری کورو یور . چوق زمان یا کلش اعتقادات اجتماعی حیاتمز نظام آلتیه آلیر . او وقت یکی بولونان حقیقت بونظامی بوزار بناء علیه یا کلش حکملرک ، وهملرک بزه تولید ایتدیکی سکونی ده ییقار . اونک ایچوندرکه متفکر روح اک چوق الم ایچنده قالیور . کنیش ندقیقات بومتفکرلری اسکی اعتقاداتی بیراقعه مجبور ایدیور . حالبوکه بو اعتقادلر اوزون اعتیادلرک نتیجه سی اولارق محیطک صدمه لری نی

تخفیف اید یوردی. بونلر ییقنجه عادتاً چیرچیلاق قالمش وضعیتنه دوشولویور. اووقت هیچ بر کوزللیکی اولمایان صوغوق بر محیط ایله قارشى قارشى به قالییورز. یکی فکرلر پیشنده فوشمغه مجبور اولان متفکرلر هر کسدن فضله حساس اولدیغی ایچون طبیعتک، ماوقعک صوغوق چهره سنی کورونجه بالطبع متاذی اولویورلر. حتی نیچه بر چوق کیمسه لرك آجی حقیقتله بویله قارشىلاشمنجه اولومی بیله ترجیح ایده جکلیرنی سویله یور. فی الحقیقه بالذات فیلسوف بوتون اعمال و افکارمرك حاکم و ناظمی اولان رحیم بر قدرت الهیه اعتقادینی، دنیاده یاپدیغمز اعمالك آخرتده مکافاتلانا جنی حقنده کی ایمانی بیراقنجه عینی یاره یه، عینی اله معروض قالمادیغی؟ طبیعتك المری، فناقلری قارشىسینده بزه تسلیلر ویره ن بو اعتقادلر ییقیلوبده ماوقعله قارشى قارشى قالینجه نه عذاب دیولور؟ مادام که اسکی ایمان و اعتقاده دونمکه امکان یوق، چونکه تقدیری بو تهلهکله ره سوق ایدن مادی و اجتماعی محیطده کی نبدلر، مادام که بالضروره آتیلدیغمز علم و حقیقت یولی ده بویله فداکارلقلره دولودر. او حالده حیاتی بیراقمق، استقبالدن امیدى کسه رك هر نوع مفکوره نی ترك ایله مک لازم کلزمی؟ بو سلسله محاکمه یه باقیانجه بو صوک سؤاله «اوت» دیمکلیکمز ایجاب ایدر. چونکه مع التأسف حقیقتله، دوغرونک بولونماسیله بشرک سعادتى آره سینده قطعی برمناسبت اثبات ایدلمش دکلدرد.

فقط نیچه بو بد بین کوروشه کندیسنى قایدیرمایور. حقیقت، اکتساب ایدن ایچون تهلهکلی اولابیلر، شوقدر که علمك، حقیقتك فائده سی انسان ایچون یوز کره، بیک کره ثابت اولمشدر. انسانیت تاریخی علم سایه سینده متمادی بر قورتولوشدر. واقعا ناصیل یکی کشف اولونان کیمیوی بر ماده نك چوق زمان انفلاقی و یاخود زهرى حاوی اولماسی یوزندن ضررلر کورولورسه حقیقتده بعضیلرینی یارالار و حتی اولدورور. فقط ناصیل انفلاقه مانع اولاجق اصوللر بولمغه چالیشیور، زهرلنه قارشىسینده پانزهرلر آریورسه ق حقیقت ایچونده اونك بو کبی تهلهکله رینی آزالتا جق تدبیرلر بولابایلر. بولاماسه ق بیله فرد بو تهلهکله ره جسارتله آتیلر. بو آتیلش بلکه قهرمانی ایچون فداکارلقلره دولودر. فقط بشریت ایچون سلامتی موجبدر. ذاتاً انسانده علم، حقیقت آرقاسنده قوشمق جسارتی پوقی؟ حقیقت محبتی بو کونکی انسانلری تحریک ایتیه یورمی؟ بو جسارتی کیمسه بزه تکلیف ایتمش دکلدرد. بالعکس انسان کنديا کسندن بویوله آتیلمشدر. پک اعلا کورویورز که انسانلرده

حقیقت آرامق فضیلتی وار و بوبشریتی دها یوکسک بر مقدره دوغری یوکسلتیور. مادام که تهلکه لر بهاسنده اولسه بزده علم یولنه آتیلحق ، حتی بر بریمزه بو خصوصده رقابت ایله مک جسارتی وار ، شو حالده حقیقت تولید ایده بیهلجکی المله رغماً بزم ایچون دها جاذبدر دیمک که بزی بو طریقه ایتنه بر حس ، بر احتراض ، بر حمله وار. بز بو حسه ، بو احتراضه « حقیقت ذوقی ، حقیقت محبتی » ده یورز .

نیچه نك تحلیل بو نقطه یه کلنجه فیلسوفک تضاده دوشدیکنی ظن ایده بیلیرز . چونکه نیچه هر نوع فعالیتده ، حتی کور و جانسز حرکاتده بیهل ذهنک اثرینی کورمش ایکن بو تحلیل ایله بالعکس ذهنی حرکت کتیره ن عاملی حسی بر الجا اولحق اوزره قبول ایدیور ، بر نوع احتراض ایله ذهنک فعالیت کچدیکنی ، یعنی علم ر حقیقت یولنه آتیلدیغنی سوبلمش اولویور . بو اولجه قبول ایتدیکی مبداءه نظراً بر تناقض دکلی ؟ خایر ، اگر نیچه « حقیقت ذوقی ، دیدیکی احتراضی اصلی بر حس و عامل اولارق قبول ایتسهیدی بو اعتماد سزلق ، بو حکم جائز اولابیلردی . حالبوکه فیلسوفه کوره اک صاف ، اک یوکسک کی کورونن حسلر و حکملر حد ذاتنده بسیط ، متواضع ، حتی کیرلی عد ایکیلنلردن دوغار . حقیقت تدریجاً خطالردن چیقیدیکی کی احتراض اولان حقیقت ذوقی ده یاواش یاواش دیگر عادی میلان و سوق طبیعیلرک تصفیه سیله وجوده کلیر . بناء علیه قبول ایتک لازم هیلر که حتی اک یوکسک علملرک اکتسابی معلومات الله ایتک املندن خارج بر طاقم سائق و محرکلرک اثریدر . اک مجرد ، اک علمی فعالیتده بیهل بو انسیاقی ، مادی سائقلرک دائماً مؤثر اولدیغنی قبول ایدلدکجه فکرلرک اصطفا سی ایچون تهلکه یه ناصیل آتیلدیغمیزی ، حقیقتک ناصیل بر عامله تشکل ایتدیکنی ایضاح ایده مه یز .

خلاصه حقیقت محبتی بسیط سوق طبیعیلردن دوغمشدر . بو تمایل و محبت کیت کیده صافیه شمش ، احتراض حالنه کلشدر . بو بسیط سوق طبیعیلر نه در ؟ تعبیر اخرله ناصیل و نه ایچون بزده حقیقت محبتی دوغویور ؟ فیلسوفه کوره بز حقیقتی سویورز چونکه بز اونک ایچون قوت صرف ایدیورز ، حقیقت تحریری غرور و هیجان دوغوران بر نوع ادمان اولویور ؛ حقیقتی سویورز چونکه حقیقتده اسکی فکرلره غلبه ایله مک ذوق و سروری واردر . حقیقتی سویورز ؛ چونکه اونی الله ایلمکه هیچ اولمازسه بر آن ایچون کندیغیزی دیگرلرینه متفوق کورویورز ، علمی حقیقتی سویورز ، چونکه بر چوق

انسانلر معین اعتقادلر ایچنده یکنسق بر حیات کچیریرکن بز بوندن قورتولویورز . علمی یول اونلر قارشیشنده بزه بر امتیاز ، بر آریستوقراطلق تأمین ایدیور .

بو سائق و محرکلردن اک قوتلیلری ، مثلاً علمک بزى دیگر انسانلره نظراً دها امتیازلی برحاله کتیردیکی قناعتی کوشه دیکی زمان دها اینجه جاذبهلر پیدا اولور . اووقتده بو جاذبهلر روحلره حاکم اولور . فی الحقیقه بز اشیا یی اکلا دجّه راحت ، سویملی ، مبدع اولورز ، روحه بر اینجه لک و ملایمت کلیر . بوتون بونلر حقیقت و علم پیشنده قوشمغه بزى سوق ایلر .

خلاصه حقیقت ذوقی بزده صنعت احتیاجی ، وضوح انسیاقی کی همان مادی بر تمایل حالنده یرلشمشدز . کیرلی بر صوی ایچمکدن ناصیل نفرت ایدیورسه ق و هملردن واونک وجوده کتیره جکی قابا بر حیاتندن ده اویله نفرت ایلهور ، حقیقته امید باغلا یورز . «حقیقت» دیدیکمز سرت وقاطی دانهلری طوپلامق ایچون چول ایچنده ، غیر مجرب یوللرده یورو مکدن قاجینا یورز . بعضاً اوفاق بر حقیقتی قانمز بهاسنه الله ایده بیلورزده ینه بهالی یه مال اولدیغنه قانع اولمایورز . بونکله برابر یاپدیغمز فدا کارلغه مقابل اقتطاف ایلده جکمز ثمره نک پارلاقلغنه قانع دکلز . مطلق حقیقتک اولمادیغنی ده بیلورز . قرون و سطانک ولیلری کی موجودیتنه اولدن ایناندیغمز بر وارلغه وصول ایچون کندیمز یاقایورز . بالعکس واصل اولاجغمز نتیجه دن امین دکلز . بز ساده جه کندیمزه موافق کله جک بر فکر استحصالی ، و یا خود موجود قناعتلرک تبدیلی ایچون فدا کارلغه راضی اولویورز . حتی حقیقتی بیلیمک احتراضنک سؤاستعمالیه انسانیتک محو اولاجغنه قناعت ایتسه کبیله بو یولدن دونه مه یز . فکر سربستیسی بهاسنه مظلم فقط ثابت بر اعتقادک تولید ایتدیکی راحت و سکونت ایچنده یاشامق دیمک اولان اولان ابتدائی حاله رجوع ایتمکدن ایسه محو اولمنی ترجیح ایده رز . بیلورز که هر زمانده ابتدائی انسانلر بزدن دها راحت و مسعوددرلر . فقط بو حیاتی ایسته مه یورز . چونکه سعادتی اکثراً بیهوده ده اولسه بر حقیقتی بولمق ، اوکره نمک ، بولمق اضطرابی ایچنده کورو یورز . علم احتیاجنک ناصیل بر احتراض حاله کلدیکنک اک مهم دلیلی بو یوزدن کله جک فلاکتلره کوکس کر مکلمکز ، حتی بو یولده سونمکه راضی اولمقلغمزدر .

ایشته نیجه نک اودورده حقیقت حقنده ، «حقیقت محبتی» نک منشای حقنده کی نظریه سی .

بو فکرلرک قیمتی ، فیلسفه تاریخنده اهمیتی نهدر ؟

بوسؤاله جواب ويرمك ايچون بن فيلسوفك نه «په رسيه قتيويزم» عنواني ويرديكي بونظريه ده مههم بير اقد قد يني نقطه لري، نه ده بالاخره رجوع ويا اكال ايلديكي جهتلري موضوع بحث ايتيه حكيم. يالكنز نيچه نك بر معرفت نظريه سي اولق اعتباريله «پراغماتيزم» ك ايلك قوتلي مدافعي اولديغني كوسترمك ايسته يورم. بوجهت غرب منقدرلرينك ده چوق كچ نظر دقتني جلب ايله مشدر. نيچه يي اوقويانلر اونك صنعتكار اسلوبنك هيچاني آلتنده قالدقلى، ياخود اجتماعي و اخلاقي قيمتلر اوزررنده ياپديغني شديد تنقيدلر بوتون دقتي جلب ايتديكي ايچون «معرفت نظريه سي» نه دائر اولان فكرلر ك نه قدر اوريژينال اولديغني چوق زمان تقدير ايديله مدي. حالبوكه نيچه نك بوجهه ده چوق درين كوروشلري وار، دينه بيليركه نيچه غربده پراغماتيزمك ايلك بويوك مؤسسسلرندن بريدر.

واقعا پراغماتيزم كله سي ده، مسلكي ده ويليام جيمسك اثرلرندن صوكرا قوتلي برجران حالي آلمشدر. آنجق ده اول بوفكر پك واضح، پك شعورلي اوله رق اورتايه قونمشدي. ايلك اول رياضي هجي فيلسوف اولان چارلس پريس Charles S. Preice آمريكانك — (Scientific Popular Review) مجموعه سنده يازديغني مقاله ده شويله ده يوردي «فكرلر يمزك صريح بر معنا آلا بيلماسي ايچون اونلر ك نتيجه لرني ملاحظه ايله مك لازمدر. اكر ايكي فكر آري آري نتيجه لره بزي سوق ايدويورسه، يعني مختلف احساسلر اوياندير يور، بناء عليه بو احساسلره قارشي باشقه باشقه طرزده عكس عمللر ده بولونمق لزومي حاصل اولويورسه بوفكرلر بر برندن آيريدرلر. تعبير آخره آنجق مختلف تأثير و حر كات توليد ايله ين فكرلر حقيقتده بر برندن باشقه درلر. بالعكس ايكي فكر عيني حر كته سائق ايسه لر، عيني تأثيري ياپيويورلر سه بونلر لفظاً بر برندن آري بيله اولسه لر حقيقتده معنالي يكد يكرينك عييدرلر. خلاصه فكرلر ك معناسني ايجه تعين ايچون اونلر ك توليد ايله جكي نتيجه لره باقق ايجاب ايدر.»

بومقاله (۱۸۷۶) ده انتشار ايله مشدي. نيچه بومقاله دن خبردار دكلدي. فقط تام و صيرالرده فيلسوفك ذهنده يوقاريد ده سويلديكمز معرفت نظريه سي تأسس ايدويوردي. چارلس پريسك عالمانه براسلوب ايله اورتايه قويد يني فكرلري نيچه بر پارجه صوكرا هيچانلي و صنعتكارانه بر لسانله اورتايه قويدی. هرايكيسنك ده مدافعه ايتك ايسته ديكي دعوا شو ایدی: حقيقتلري، حتي عمومي صورتده «حقيقت» فكريني عمل، ايش، حيات

وجوده کتیر مشددر . بز کنیش معناده احتیاج لری می ، میلان لری می ا ک زیاده تطمینہ صالح اولان ، اعمالک قدرتی آر تیران فکر لره « حقیقت » ده یورز . [۱] بناءً علیه « حقیقت » ک قیمتی ، معیارینی نتیجه ده ، عمل ، ایش ، حیات ساحه سنده آرامق لازم کلیر . صوکرالری پراغماتیزمک ا ک بویوک فیلسوفی ویلیام جیمسک ده مدافعه ایلدیکی دعوا بو دکلیدر ؟ نیچه بو دعوا یی کندی (په رسیه قتیویزم) نظریه سیله برلشدیرهرک اورتایه قویدی . فقط معرفت ساحه سنده ، « حقیقت » مسئله سنده پراغماتیزمک اصل مدعاسنی نیچه او زمان بویوک قوتله مدافعه ایله مشدی .

نیچه نك بو نظریه سنك قیمتی یالکیز بو قدر دکلدر . بو کونکی انسانیتک ا ک حساس نقطسی کی کورولن « حقیقت محبنی » نك منشائی آرادی . واقعا بو خصوصده تعقیب ایلدیکی یول روشفوقولک اخلاق ساحه سنده تعقیب ایتدیکی طریقدن آری دکلدر . یالکیز بو خصوصده کی روحی تحلیللری بالخاصه اوروحی تحلیلله کنیدیسنی سوق ایدن اسباب چوق شایان دقتدر . نیچه مدنیتک اساسی کی کورولن قیمت حکملرینک نه یه یارادیغنی بویوک برجسار تله اورتایه آتمشدر . بو قیمت حکملری آراسنده « حقیقت » ده وار . نیچه نه ایچون « حقیقت » ی ایسته یورز ؟ نه ایچون « حقیقت » محبتی منور زمره نك روحلرینی اهتزازه کتیریور ؟ خلاصه « حقیقت » نه یه پیشنده قوشوله جق بر قیمت اولویور ؟ سؤاللرینه شایان دقت بوروحی تحلیل ایله جواب ویردی . صرف فردی اولان « حقیقت » ک نه ایچون وناصیل اجتماعی بر قیمت اکتساب ایلدیکنی کوسترمکه چالیشدی .

فلسفه تاریخی مدرسی

محمد امین